

Zeitschrift: Annalas da la Societad Retorumantscha
Herausgeber: Societad Retorumantscha
Band: 75 (1962)

Nachruf: Prof. dr. Guglielm Gadola
Autor: Maissen, Felici

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 02.04.2026

ETH-Bibliothek Zürich, E-Periodica, <https://www.e-periodica.ch>

Prof. dr. Guglielm Gadola

da Felici Maissen

Ei dat cartgauns che, muort lur personalitad exprimida, marcanta ed originala, adempleschan ella publicitad ina missiun per aschidedir nunremplazzabla. Cul sparter da quest mund fan lu tallas personalitads adina ina gronda, ina dolorusa largia, buca mo el cercel dils lur pli datier, mobein era ella cuminonza d'in pievel entir. Ina de quellas personalitads pregnantas era professer dr. Guglielm Gadola, morts duront sias vacanzas al Lag dils Quater Cantuns, ils 12 de fenadur 1961, ch'el veva aunc buca compleniu siu 59avel onn. Memia baul, tenor calcular human! «Ins stat mal, igl ei donn, sin tuts mauns vegn ins a sentir, che dr. Gadola ei buca pli», ha in scret cuort suenter sia mort. Ed ussa encorschein nus en verdad quei sin tuts mauns. E la musa romontscha plonscha la sperdita de siu grond fegl e fautur.

Ils 6 de november 1902 han ins mess en tgina il pign Guglielm ed il zenn de batten de S. Gions a Mustér, nua che Gadola ei naschius e tratgs si, ha lu sunau ed annuziau legramein — negin che sminava lu quei — la naschientscha d'in grond cantadur della musa e fegl della Mumma Romontscha. Siu bab dil medem num era da professiun mazlèr cun in brav menaschi puril e siu basat, aschia han ins aunc udiu a discurend, seigi vegnius neu dalla «Tiara Taliana», sul Lucmagn, cun in schierl plein agl e tschaguolas. Al hermer dil sid para la cuntrada de Mustér de haver plaschiu pulit ed el po haver detg sco Sigisbert en Rezia: «Cheu e buca pass pli lunsch», ed ei sefermaus a Mustér; nua che la famiglia ei sesmembrada pulitamein, arrivada ad ina biala fluriziun economica e s'acclimatisada a nies sentir e patertgar quasi perfetgamein. Mo in bien ton dil temperament meridional ei restaus a nies professer e dalla mumma, ina Decurtins e Tuatschina da tgau entochen pei e della megliera pasta po Gadola haver, — sco Goethe — artau il gust da fabular, mo era l'inclinaziun per la veta purila cun tut ses usits.

La cuorsa della veta studentica ha nuot aparti. — Suenter ver frequentau la scola primara de siu vitg va el al gimnasi «sin Claustra». Leu sto P. Baseli Berther haver giu ina extraordinaria influenza sin il giuven student. Gadola ha era sia veta demussau ina aparti gronda admiraziun per siu magister. Sco Berther, aschia ha era Gadola giu in fin sentiment e plascher per la historia e folclora locala. Suenter la conclusiun dil gimnasi ad Engelberg tiels benedictins serenda Gadola a Friburg per il studi universitar, nua ch'el occupa oravontut las disciplinas de filosofia, litteratura e historia. Continuond quels studis a Turitg, sesa el giudapeis da prominents magisters sco Gagliardi, Karl Meyer, Nabholz, Jud ed auters. 1930 promovecha el sco dr. phil. cun la dissertaziun: «Historia della Litteratura sursilvana della reforma e cunterreforma.»

Da 1930 tochen 1961 cun sia mort ei Gadola professor de franzos e historia alla scola cantonala a Cuera. «Sco il suleagl» aschia ha in bien amitg scret sur ded el sco professor, «Sco il suleagl cun sia glisch e calira ha immensa forza e dominescha e diregia las creatiras el cerchel de siu sistem, aschia fiera era in scolast u professor ses radis della personalitad sin ses scolars e daventa per biars la direttiva della veta en fatgs ed affars de nundumbrevilas vias e clamadas. Ses scolars dian che prof. Gadola eri buca in pedant el problem della disziplina, captivavi denton tonpli e scaffevi silenzi ed interess tras siu viv spert e discuors fascinont. El era in scolast impulsiv cun in excellent dun de purtar avon ed incantar.» Con che prof. Gadola ha en quels trent' onns de formaziun della giuventetgna studentica operau, con el ha semnau e — raccoltau, quei selai buca enumerar, tschaffar ni en plaids ni en cefras mo nus essan segirs, che quei ch'el ha dau cun mauns pleins, viva vinavon e vegn purtau vinavon viado el pievel e porta fretg en benedicziun.

Gadola ei staus nundisputeivlamein in dils pli fritgeivels ed originals sribents en survetsch della Mumma Romontscha. Ei vegn enumerau da 70 tractats de tempra historica e folcloristica e da 40—50 novellas, historias e historiettas. El sez, in carstgaun optimist, led e de bien humor, prefereva las historiettas burlescas. Aschia resplenda ina lavur en fuorma de roman sco «Paul Luziet e sias marletgas» per numnar mo ina humoresca per tuttas, vera personalitad, tempra, genuinitad e character de Gadola. Las biaras de sias lavurs ein compa-

ridas el Glogn, dil qual el ei staus redactur da 25 annadas. Dasperas ha el redigiü 15 onns igl «Ischi».

Il terren historic ha Gadola arrau pulitamein. Da valeta cuzzonta vegn a restar principalmein sia «historia dil teater romontsch», e lu buca il davos sia «historia dil sentiment religius en Surselva de messa», comparida en pliras ediziuns digl Ischi. Dasperas ha Gadola era preparau ina partida discuors, rapports e raquents per il radio. Numerusas ein sias recensius en gasettas romontschas e tudestgas e perfin italianas, ses artechels e tractats. Pilver ina veta tgemblada da lavur. Il professor permiert ha pilver relaschau a nus ina impurtanta e reha jerta. Nossa obligaziun eis ei de conservar quella e cultivar vinavon il terren ch'el ha entras la mort nunspitgada stoviu bandunar. En scadin cass engrazein nus a prof. Gadola sin sia fossa frestga per tut il bia, bi e bien ch'el ha regalau a nus ed il Segner detti ad el la pagaglia eterna.